
Hutba reisu-l-uleme povodom predstojećih izbora

18. muharrem 1440/ 28. septembar 2018.

Hvala Allahu, Gospodaru svjetova.

Milostivom, Samilosnom.

On je iznad svega i svakoga.

U Njegovoj veličini i milosti je naše utočište. I naša snaga.

Neka je salavat na poslanika Muhammeda i njegovu čistu porodicu.

On i njegovi ashabi su naš uzor.

Onoga koga Allah na Pravi put uputi – niko u zabludu ne može odvesti, a onoga koga On u zabludi ostavi – niko na Pravi put ne može uputiti.

Svjedočimo da je samo Allah Bog i da je Muhammed, a.s., Njegov rob i Njegov Poslanik. On ga je poslao da radosnu vijest donese i da opomene, prije nego što nastupi Sudnji dan.

I ovdje sa ovoga mjesta u ovom blagoslovljenom danu mi još jednom svjedočimo Božiju Jednoću iskazujući mu zahvalnost na blagodatima domovine, slobode i jedinstva.

Poštovana braćo i sestre.

Nalazimo se još uvijek u danima svetog mjeseca muharrema, jednog od četiri sveta prema Allahovoj Knjizi. To je mjesec u kojem je posebno zabranjeno poticanje bilo kakvog neprijateljstva i mržnje.

Naša tradicionalna ulema nas je učila da je Uzvišeni Allah zabranio nasilje i svaki oblik grijeha prema drugima i sebi, u svim mjesecima tokom godine, a da su nasilje i grijesi u svetim mjesecima još strožije zabranjeni i da je kazna za one koji u njima siju razdor i neprijateljstvo među ljudima veća.

Muharremom smo ušli u novu hidžretsku godinu. Svi smo se na dan hidžre prisjetili iseljenja plemenitog Poslanika i te velike prekretnice u historiji ummeta. Ispratili smo i mubarek dan Ašure kada smo se prisjetili brojnih događaja iz historije Božijih poslanika i plemenitog ashaba i unuka Pejgambera, .a.s. Husejna, r.a., i njegove spremnosti da žrtvuje sebe i svoju porodicu kako bi se usprotivio nepravdi, nasilju i korupciji koja se počela širiti u muslimanskom društvu.

Ovaj časni mjesec i danas budi našu radost, ali i svijest o stalnoj ljudskoj potrebi da se zadovoljstvo i smiraj traže i nalaze u duhovnim vrijednostima ovog svijeta. Sve božanske objave, kao i sadašnja i davnašnja iskustva čovječanstva, svjedoče da su sreća, smiraj i zadovoljstvo vezani i za duhovnu i za materijalnu dimenziju života. Nada i izvjesnost posrnulog čovjeka današnjice je u čvrstom vjerovanju u Boga i drugi svijet, obnovi moralnih vrijednosti i spremnosti da se dobrim djelom koristi drugom čovjeku i zajednici.

Zato tražimo inspiraciju u porukama koje sa sobom nosi ovaj sveti mjesec i ustrajavajmo u dobrovoljnom ibadetu posta i noćnog namaza u njemu. Prenosi EbuHurejre r.a. da je Poslanik, a.s., rekao: 'Najbolji post poslije ramazana je post mjeseca muharrema, a najbolji namaz poslije fard namaza je noćni namaz!' (Muslim)

Braćo i sestre!

Muslimanu nije dozvoljeno nered na Zemlji činiti. Njemu ne priliči da ikome nepravdu nanosi, niti da nepravdu trpi. On nije taj koji sa neprijateljstvom započinje.

Islam nalaže da se svačije pravo poštuje. Život, imovina i čast pojedinaca su sveti i nepovredivi. Istovremeno, od svakog člana društva se traži da doprinosi njegovoj stabilnosti i uređenosti u kojem će biti mjesta za svakoga i u kojem će svako imati svoju ulogu.

Ovo zbog toga što je čovjek društveno biće koje nužno živi u zajednicama i narodima naseljavajući regije i države, gradove i sela. Zbog toga što sreća i zadovoljstvo pojedinca zavise od stabilnosti i sigurnosti društva i zadovoljstva svih njegovih članova.

Uređenje društva je nemoguće bez pojedinaca koji su zaduženi da promiču vrijednosti i čuvaju pravo i čast drugih ljudi, i koji se odazivaju na poziv Uzvišenoga da unaprijeđuju dobro i odvrćaju od zla. Oni su poput pastira odgovornih za svoje stado. Zato niko od nas ne može biti nemaran prema onome što se u našem društvu i državi dešava.

Braćo i sestre!

U nedjelju 7. oktobra 2018. održat će se, ako Božija volja i određenje bude, opći izbori u Bosni i Hercegovini. I kao i ranijih izbornih godina i ove vas pozivam da iskoristite svoje pravo i da jedno od najvećih dostignuća savremenoga svijeta – pravo i mogućnost slobodnog biranja i odlučivanja – zajedno stavimo u službu našega općeg dobra i napretka. Neka nas u tome vodi imperativ naše vjere: „Allah vam zapovijeda da odgovorne službe onima koji su ih dostojni povjerite.“(4:58)

"إِنَّ اللَّهَ يَأْمُرُكُمْ أَنْ تُؤَدُّوا الْأَمَانَاتِ إِلَىٰ أَهْلِهَا"

Vaš izlazak na izbore nije samo vaše građansko pravo nego i građanska, moralna, pa i vjerska obaveza. Glasanje na izborima je poziv da posvjedočite o ljudima ono što znate jer će oni preuzeti pozicije na kojima će odlučivati o sudbini svih nas, htjeli mi to ili ne. Islam nas uči da ne smijemo uskratiti istinito svjedočenje kada budemo pozvani da o ljudima i događajima kažemo ono što znamo. U Kur'anu čitamo:

وَلَا تَكْتُمُوا الشَّهَادَةَ وَمَنْ يَكْتُمْهَا فَإِنَّهُ آثِمٌ قَلْبُهُ وَاللَّهُ بِمَا تَعْمَلُونَ عَلِيمٌ

“I ne uskratite svjedočenje; ko ga uskrati, srce njegovo će biti grešno, a Allah dobro zna ono što radite.” (El-Bekare: 283)

I kao što je odbijanje svjedočenja kada se to od nas traži grijeh još veći je grijeh lažno svjedočenje.

يَا أَيُّهَا الَّذِينَ آمَنُوا كُونُوا قَوَّامِينَ بِالْقِسْطِ سُهَدَاءَ لِلَّهِ وَلَوْ عَلَىٰ أَنْفُسِكُمْ أَوِ الْوَالِدِينَ وَالْأَقْرَبِينَ ۚ إِنَّ يَكُنْ عَنِّيَ أَوْ فَقِيرًا فَلِلَّهِ أَوْلَىٰ بِهِمَا ۚ فَلَا تَتَّبِعُوا الْهَوَىٰ أَنْ تَعْدِلُوا ۚ وَإِنْ تَلَوُّوا أَوْ تَعْرِضُوا فَإِنَّ اللَّهَ كَانَ بِمَا تَعْمَلُونَ خَبِيرًا

“O vjernici, budite uvijek pravedni, svjedočite Allaha radi, pa i na svoju štetu ili na štetu roditelja i rođaka, bio on bogat ili siromašan, ta Allahovo je da se brine o njima! Zato ne slijedite strasti – kako ne biste bili nepravedni. A ako budete krivo svjedočili ili svjedočenje izbjegavali – pa, Allah zaista zna ono što radite”. (En-Nisa: 135)

Zato vjernik na dan izbora ne može ostati po strani i ne može glasati osim po svojoj savjesti i moralu.

Braćo i sestre,

Sloboda i pravo izbora koje danas imamo zahvaljujući Božijoj Milosti, a zatim žrtvi naših najboljih sinova i kćeri ne smijemo olahko prodavati.

Islamska zajednica u Bosni i Hercegovini ima saznanja da se u manjem bosanskohercegovačkom entitetu organizirano kupuju glasovi Bošnjaka povratnika, a da je ta pojava posebno izražena u Srebrenici i drugim zonama počinjena genocida.

Stoga kao reisu-l-ulema apelujem prije svega na muslimane da ne podliježu pritiscima i da ne trguju svojim pravom i slobodom. A isto vrijedi i za sve građane naše zemlje.

Znamo da naš narod jako teško živi i da se osjeća ostavljenim, ali oni koji danas od Bošnjaka kupuju glasove su upravo oni koji im sistemski uskraćuju bilo kakvu priliku za zapošljavanje i koji ih drže na društvenim marginama.

Prodajom glasova Bošnjaci gube svoj politički subjektivitet u Bosni i Hercegovini a posebno tamo gdje su u manjini. Ta se greška neće lahko ispraviti.

Draga braćo i sestre,

Ako ne budete imali one koji će vas predstavljati iduće izbore ćete taj glas prodavati i za manju cijenu jer ćete biti još više obespravljeni i u još težoj poziciji.

Oni koji od vas kupe glas više nemaju nikakve odgovornosti prema vama, nemaju obaveze i vi vaša ni kolektivna ni individualna prava nećete moći ostvariti. Dajte glas onima u koje ste se uvjerali da su dostojni vašeg povjerenja i držite ih odgovornim tokom njihovog mandata.

Tražite od njih više, to je vaše pravo, ali ne trgujte svojom slobodom i dostojanstvom.

Najveći problem našeg društva je korupcija koja nas izgriza iznutra i koja prijeti da uništi samo vezivno tkivo naše države. A posebno zlo je politička korupcija koja obesmišljava sam izborni proces i potkopava demokratske procese. Bez slobodnih i fer izbora nezadovoljstvo i frustracije će se samo povećavati i to će dovesti samo do većeg beznađa i u konačnici nastavka trenda iseljavanja. 7. oktobar je prilika da ponovo uzmemo budućnost u naše ruke.

Ovom prilikom želim vas podsjetiti na to da smo kao narod dugo bili predmet tuđih politika i skoro nikada aktivni akteri i kreatori vlastite. Taj podređeni status smo platili gubitkom hiljada života naših najboljih sinova, pa i naše nejači, imovine i nacionalnih prava. Dok su drugi

razvijali svoje nacionalne, društvene i vjerske ustanove, mi smo bili primorani na preživljavanje, braneći goli život. Stoga, danas, kada smo povratili svoju slobodu i dostojanstvo i osigurali pravo da biramo svoje predstavnike, slobodno i po vlastitoj savjesti i interesu, nemojmo to pravo poklanjati drugima. Jer, time bismo im mogli pokloniti i našu slobodu. Sjetimo se da mnoge zajednice u današnjem svijetu još uvijek vabe za tim pravom i slobodom.

Naša je obaveza da u svakom trenutku prepoznamo politiku koja će, na osnovu naših temeljnih vrijednosti, narodne tradicije i bosanskog komšiluka, određivati naš pravac, čuvati narod, sigurnost i povoljan položaj naše zemlje, i na istoku i na zapadu, i koja će učvrstiti ime našeg naroda među drugim narodima svijeta. Dužni smo neprestano doprinositi sigurnosti, dobru i napretku našeg naroda i drugih u našoj zemlji.

U proteklih nepunih mjesec dana, brojni su nam se kandidati i stranke predstavili i imali smo priliku čuti njihove ciljeve. Podržimo one koji su sposobni da ostvare obećano i koji imaju realne pretpostavke da to učine. Ne dopustimo da u tome važnom odlučivanju budemo predmet manipulacije. Prosudujmo mudro i postupimo savjesno i odgovorno!

Kao muslimani, ne možemo birati one koji su u politici isključivo zarad ostvarenja svojih ambicija, koji pokazuju lažnu brigu ili iza kojih stoje tuđi ciljevi, jer je to najbliži put da naš narod bude uklonjen s realne političke scene.

Izaberimo one koji su vrijedni, odgovorni, spremni za dijalog, vjerodostojni i opredijeljeni da pomažu i grade, a ne da ruše i zameću kavgu; one koji će štiti život, imetak i čast svakog ljudskog bića; koji će se boriti protiv mržnje i isključivosti, a zalagati se za istinu i pravdu. Glasajte za one koji o svakom građaninu ove zemlje misle isto i žele im dobro. Ne podržavajte one koji siju smutnju i podstiču na razdor. Oduprimo se zajednički bez obzira na vjeru i nacionalnu pripadnost vala populizma koji je zapljusnuo i obale Evrope.

Izaberimo one koji će odlučno ustati protiv diskriminacije, zalažući se za slobodu savjesti, vjerskog opredjeljenja i prava na obrazovanje i koji će se boriti da se ostvari svačije pravo na slobodu, jednakost i sreću.

Neka su nam uvijek na umu Allahove riječi: „Svi se čvrsto Allahova užeta držite i nikako se ne razjedinjujte! I sjetite se Allahove milosti prema vama kada ste bili jedni drugima neprijatelji, pa je On složio srca vaša i vi ste postali, milošću Njegovom, prijatelji; i bili ste na ivici vatrene

jame, pa vas je On nje spasio. Tako vam Allah objašnjava Svoje dokaze, da biste na Pravom putu istrajali.“(3:103)

“ وَاعْتَصِمُوا بِحَبْلِ اللَّهِ جَمِيعًا وَلَا تَفَرَّقُوا وَاذْكُرُوا نِعْمَةَ اللَّهِ عَلَيْكُمْ إِذْ كُنْتُمْ أَعْدَاءً فَأَلَّفَ بَيْنَ قُلُوبِكُمْ فَأَصْبَحْتُمْ بِنِعْمَتِهِ إِخْوَانًا ”
” وَكُنْتُمْ عَلَىٰ شَفَا حُفْرَةٍ مِنَ النَّارِ فَأَنْقَذَكُم مِّنْهَا كَذَلِكَ يُبَيِّنُ اللَّهُ لَكُمْ آيَاتِهِ لَعَلَّكُمْ تَهْتَدُونَ ”

I na kraju , još jednom vas pozivam da izađete na izbore i glasate po svojoj savjesti.

Gospodaru naš,

ne ostavi nam ni jedan grijeh a da ga ne oprostiš,

niti jednu brigu a da je ne otkloniš,

niti ijednu želju i potrebu s kojom si Ti zadovoljan, a da je ne ispuniš, o Ti od svih milosnih,

Najmilostiviji!